



郭明經遺集卷三

長沙郭志正植夫

恭擬

皇太后歸政舉行各直省

恩科謝表

光緒十五年某月某日具官臣某等恭遇

皇太后歸政

深宮崇上

徽號

特詔舉行各直省恩科鄉會兩試以昭振興人才之至

意臣等謹奉

表稱

郭集三

謝者伏以

母儀日麗咸欽德化之柔雍

聖渥天浮用契明揚之和會經邦論道美馬鄧於當年

勵善親賢見任姒於今世舉中安萬安以建號玳瑁爲

簪合俊士秀士以分榮珊瑚結網平均雨露會須鱗脫

天池盛選棟樑深幸鳳棲瓊樹屏藩有慶韋帶騰歡臣

等誠惶誠恐稽首頓首上言竊維大經中經貴取士之

必得甲第乙第惟用賢而勿疑奏牘三千必有冠時之

作策科第一爰徵命世之材故明目達聰寫賡歌之盛

事興賢考道垂大比之嘉儀爲朝廷得一帥才義敷魚

藻賜同榜皆爲進士詩繹鹿茸御勤政之樓唐尙詞賦
宴講武之殿宋賜餐錢沐浴泗之高風人盡青衿介幘
敘曲江之佳會器皆紅硯宣毫雲五色而祥開燭三條
而彩綴然而別頭及第雖恩例之可援問目爲文終榜
花之見誦未有九科三考詞林共鄉校同登一歲兩魁
桂苑與南宮並啟如
今日者也茲蓋伏遇

皇太后

皇帝陛下

虹壁當陽之際

郭集三

龍輿倦勤之年

訓流國闡崇乎儉而裁乎義

風宣宸掖沛以教而煦以仁董勸歌戒三百章惟后作
箴惟辟作德福壽隆貴四十載與天齊量與月齊明長
樂居尊萬國於焉歸美大安奉輦六宮靡不攄忱承天
則親御戎車三軍用命慈聖則兼工飛白八法揚芬斯
皆前代之清懿莫逮

熙朝之景鏢湖白

周王西伐而粵嶠煙沈

虞后南巡而金陵草碧

前聖以冲人嗣統恢

武略而翦長蛇

重闈以淑德垂簾溥

慈恩而徠天馬

勳侔震象既電發而風行

位協坤儀復雲披而日覩圖王會者三十六國胥梯山
航海而來佐

昌期者十有五年以蹈德詠仁爲務賞奇納異稷契足
爲筋力之儲盡圓竭方蕭曹不愧股肱之寄施石象魏
置鼓公車士多忠至之辭側席朱楹翹心紫禁野無自
蔽之響然後五鐸啟號十世以光洗甲執禽邊無鹿駭
狼顧觀醑會飲民皆魚樂烏馴十日雨而五日風河洛
獻圖書之瑞九年耕而三年食江淮無芻粟之輸爾乃
景耀敷宣

郭集三

三

總大麓而史臣載筆和風翔洽

幸東館而海宇生春

天子以孝備

皇儀

聖后以謙全國體

冊鐫華玉物盛者斯禮必崇

寶鏤精瑤

命新者斯情獨渥

義明八遠懷獻爾之清娛

道變九圍戀含飴之至樂

慈仁爲天下之母胎炎而孕黃

徽音極域中之尊符蒼以媿昊雲氣燦陳於玉禁允孚

錫類之思

天顏有喜於瑤階爰下推恩之典恐奇寶之遐棄斯來
袋之高懸乃摘人鏡之芙蓉鴻才競噪播春官以桃李
馬足爭看拾地芥而非夸班聯玉筍縫天衣而交燦曲

郭集三

四

記霓裳距

聖皇御宇之初再行曠數當多士如林之日各抱遺經
三輔槐黃藉滌去歲龍門之辱上林杏熟預攬明春雁
塔之榮忙到月宮屢織登科之記盼回雲路重開選佛
之場兩度春風易曰拔茅連茹一般華燭詩云鼓瑟吹
笙傾東澗以求珠三薰待士闢昆岡而采玉一字拔人
貞元之策賢良無能過此寶祐之明經義曾何足云萬
古奇逢三升盛典允矣薪樵之化煥乎圭璧之光臣等
技薄雕蟲識同窺豹媿厠金章之寵叨分玉局之班持
衡而莫擘芳蓀分校而多慙風雅瓊林宴上獻新製而

未工鳳味堂前屬遭逢之有幸得與鵬搏之會彌增鶚薦之思伏願

化洽春臺

治超秋賦以詩書爲法律法吏通經卽文藝見經猷經
生明法抑華崇實韋貫之之進賢推奧析疑蔡元定之
澤古樂聲起於東塢文運聿新袍笏賜自尙方人材鼎
盛秋深桂殿蓼蕭沾濃露之華日絢繒峯葵藿麗太陽
之曜金甌早卜不數夫七十二君玉燭長調永固於百
千萬世矣臣等無任瞻

天仰

郭集三

五

聖激切屏營之至謹奉

表稱

謝以

聞

新疆雅并序

漢代張騫通大宛月氏班超都護西域拊鞬而斷其
右臂蓋三十六國焉然問俗雖極諸瀛壖之遠事實雖
詳於蘭臺之篇德不逮昔或梗或馴迄不能俾祁連南
北刻滌畛畦化爲州郡與函夏黔黎同文而一俗兩晉
六朝中國多故邊夷披猖震先鋒而通舊國絕少微聞

李唐膺錄廣開磧路晶杯寶帶活褥偕登五季寢微獻
杵紀年司戈授士其掌故之足資考證者如斯而已宋
建砮鱗之號明有金印之褫莫克亨毒其民安望經界
其地乎繫我

聖清規模宏遠

神武者定臨瀚海而躡天山雖以大和卓木波羅泥都
小和卓木霍集占之猜忍終竄身於荆棘莫逞其鴟張
準噶爾厄魯特之負固憑險包藏禍心亦自翦其羽翼
首懸大纛此

純廟太學紀功之碑歷據其

郭集三

六

恩威並用之至意而

聖製詩尤殫述情形者也蓋自伊犁

戡定以來分其部落勒爲輿圖以嘉峪關玉門敦煌至
安西州爲安西南路以哈密鎮西府迪化州爲安西北
路以庫爾喀喇烏蘇至伊犁塔爾巴哈臺爲天山北路
以闡展哈喇沙爾庫車葉爾羌和闐爲天山南路築城
置吏引渠屯田出雁門而沙草黃行戈壁而冰山結齊
氣朔乎天文授版籍於職方其編戶之氓稔積粟米與
中土相埒詩書絃誦駸駸有鄒魯風卽投荒禦魅者流
亦皆力稼穡宜室家補過遷善喁喁如也其甲束之兵

瓜戍之卒帶牛佩犢寓兵於農不失古意以故居者無
怨曠之思行者有糧糗之需而王粲從軍杜陵出塞固
無所陳其詠歎其富商大賈攘袂虜至寶貨雲集既引
旣遷而踰關度嶺勿戒慢藏其降蕃屬國越雉來庭旅
葵底貢輸誠納款無遠弗屆窮廬沙幕之族役之如臂
指白山赤坂之外視之猶郊遂巍巍乎煥煥乎何

皇模之恢廓哉邊患之興端由內侮咸豐之初粵逆發
難削耒爲兵裂裳爲旗湘皖援而狼煙熾金陵復而龍
節驅西陲所帖服者皆蠢然而騷動

穆宗稟聖武之姿收中興之功闔以外之方略悉寄於

郭集三

七

有司故其時秉旄杖鉞者得從容籌運以盡其長師興
十餘載地拓數萬里凡巴里坤布魯特以遙跡所未至
者罔不分隸黃圖言語侏儻衣冠侷異之倫罔不匍匐
稽顙願爲臣僕此故大學士左文襄公之策時應機條
便宜而定武略其實

今上招攜懷遠外攘內安斯能入荒賓服歲獻哈密之
瓜文刻和闐之玉率爾操觚述爲銘頌以比葱女之詞

云爾銘曰

鴻濛造分畫井作邑販章式廓鬼區沓集河源星宿九

折朝宗葱雪絕徼款關來同一其於維

列聖左德右威通驛萬里受吏西陲文鉞碧帑史不絕
書荒憬清夷豚魚用孚其二踰沙軼漠徙縣中宇爰清爰
靜修文偃武犁庭掃閭直搗陰山泐碑契苾繫組呼延

其三

高宗在位眉壽且康熄彼機槍惛慄遠荒遠荒反側睢
盱不賓竄匿奧韃負我

皇仁

其四

王者之師有征無戰鋒蝟斧螳震雷耀電出車

六月格苗三旬百靈助順集此大勳其五陰磧摩天流沙

界域降王持挺元戎伏軾我武維揚孚彼遠人四分五

剖殷殷振振

其六

星緯咸若北斗少西滋花以風鋤瓜以

郭集三

八

畦駝馬被錦鼓角騰川酒薈葡萄鳳律書元其七吐蕃內

附安史禍萌鄴善歸化漢德中興藐滋髮醜蹂躪中土

象寄乘機營窟重阻

其八

衝瘴渡瀘丞相揮戈力拔昆侖

盡驅六騾飲馬鹽澤作樂象功康居烏耗經訓明農其九

雪山連亘制要握奇玉水淪漪別爲藩籬炎之如日函

之如海

惠民無疆優游樂愷

其十

湖南中興名臣序贊

在昔漢苞七德而耿鄧杖策唐洽九功而李郭受鉞苟
非鳳舉四維龍騫八表而何以小征大匡東戡南翦風

雪聽命弧矢無加敘南陽之舊勳呼河朔爲驍將竟能
掃清逋殘混一區宇哉

聖清蒙業二百載止戈爲武九服清怡有蜚爲災長蛇
外鬪金田嘯聚江淮陸沈邊將無功義旗爭樹於斯時
也桂梧貽養癰之憂舒桐罹噬臍之毒柳永據搃吭之
勢南饒蹈履尾之傷重以河洛多釁羌戎構怨以陶侃
之仇爽宗澤之忠奮戰無不謀謀無不美恐亦難措柱
於今日也迺者五星聚奎婁之次一戎定郊鄔之鼎噉
嗜宿將前有王句磊落英多後有張廖或龍驤而麟振
或鶴列而鷹揚采十二之陳圖保五千之甲楯顧盼則

郭集三

九

華嶽西頽叱咤則怒靄東擊用能擧欽侯之旗斬郅支
之首薦功告類慕義來歸夫跡不邁乎三五不足以追
涿鹿功不希乎四七不足以繪雲臺忠烈才儲榦濟學
綜韜鈴其接物也有朱家郭解之風其應變也有高昂
李晟之略部署楚師削平粵黨領赤心之隊連石手之
軍以壁壘爲家庭以將帥爲父母何其摯歟卒之抽光
弼之鞞刀裹伏波以馬革喋血霑衣飲冰傷骨蓋又非
瑣瑣者所能逮已忠節以濂洛之緒論操衛霍之勝算
允文不害爲儒生元凱自許有左癖選荆楚之弩手殲
澠六之餘孽八道俱攻十城盡拔民無遺芻之歎士有

挾纊之懽惜乎黃龍之痛飲未終白馬之哀思欲絕文
忠持黑稍以禦敵踞胡牀以整軍夙諳三隱頻致九捷
躬臨武漢據其上游拔峴首若轉丸平荆門如沃雪融
風未揭大星已沈吁足忱矣文正墨經治戎朱纓表眾
排異議萃銳師履險難奏膚功赤亭懸彊弩二十渭南
植官柳七千洩三楚之軍謀盪六朝之王氣拔銅駝於
荆棘之中斫石鯨於波濤之側抑何壯哉忠武挽馬燧
之軍符練仲淹之將法動止應規進退中律撞車毀堞
所向無前九攻九距八遇八克敬則跳刀奉先射戟殆
無以過之文襄以入幕之郟生爲負楯之孔覲上馬擊

郭集三

十

悍賊下馬草捷書襲浙閩驅海島拓玉關以萬里倚雪
山爲重鎮積甲高與熊耳山齊據鞍有封狼居胥意剛
直以佔畢之儒收功漢水勇慤以趨卞之性宣義秦隴
鷄首萬艘犀甲五色薄楊太於洞庭戮正己於淮渚赤
壁之烏鵲不鳴廣陵之飄檣如織一則爲人中之驥一
則爲地上之虎若斯者奮武行閒乃心

王室兼弱攻昧批亢擣虛奉

宸算贊

天威厲士利械而涉難不匱也或謂衛青屢獲本乎天
幸馮唐爲郎安乎時遇阮公之嗤項籍魏祖之誠夏侯

以時規之蓋非然矣何則粵氣擾攘湘人應募者蓋億萬計任膂力參幃幄張宗請爲後拒段灼願効前驅藥師有方面之功馬謖獻攻心之策截湘山之竹莫敘其勳階刻石鐘之碑難標其姓字卽若

史館揚芬

紫光畫像可以陶鑄萬彙俎豆百禩者已未可更僕數矣惟據曩昔之所忻慕耆宿之所熟稱比而撰之以爲贊云

填填顛顛運丁陽九蠢茲髮酉若苗有莠我武維揚大風吹垢刁斗不驚羣酋折首觥觥江公萬夫之雄謀爾

郭集三

七

後戰儒帥所宗角試桀雋環湘以東永安缺隅嘉言莫庸蓑衣旣捷長沙戒嚴公奮厥武昌瓦瓦全生原玉潤死亦金堅肝膽困輪軸後超前望塵知敵惟胡與羅方城漢水翳蔽三河居者積粟行者荷戈運籌虎幄斯琢斯磨荆襄巨鎮古稱天險李愬平淮功過相掩閩外春秋抱鉛削槩太華可移孤軍難撼主靜研幾西銘是續陰符六韜無足甄錄昔有姚江今有羅山致學不侔動則齊觀李君嶽嶽韓耿之流山摧半壁鐵紐萬舟人當其脆己當其堅怒馬陷陣身隕譽延塔畢能軍劉張致果老謀善斷軍中一左淮陽三捷諸葛七禽白徒用命

長狄歸心上功中功渾濬互爭若彭若楊共悴同榮龍
首鷓尾浮湘達淮衝彼噎水颿檣亂飛岳陽再圍石頭
直破中興作武彼唱此和彭公伉直橐惟圖書名紀庸
器與衛霍俱德勳莫二首推曾侯兜鍪選將樞算作猷
發石有軍籌邊有樓出管入樂武備文修周之中葉有
虎有方詩人頌功播爲樂章

國儲榦棟實相頡頏仰晞遐風百代芬芳

史記先黃老後六經辨

粵自六籍旁搜孔曾之道顯異學紛布黃老之術貴是
故由博返約五常立而四教成以退爲進萬物齊而三

郭集三

十三

氣幹經者常也質文遞變而師法尙存道者路也名法
滋繁而民彝漸汨苟非棲神沖漠結想渺冥疇復陷荆
棘而避康莊棄菁莪而拾糟粕則孟堅所謂先黃老後
六經者不足爲子長病矣功利之習開於晚近故管晏
次乎伯夷刑戮之弊窮乎漢初故老莊比乎商鞅秦燔
詩書而簡編缺楚主戰伐而文藝晦尼山不作王政寢
衰三千之徒星流而雲散六七之國虎視而鯨吞子張
居陳子羽居楚子夏居西河子貢終於齊大義微言不
絕如縷而子方干木以廉靜爲先吳起滑釐以恢奇自
廣高帝由布衣爲天子以馬上取天下明堂學校日不

暇給文景纘業綜覈名實故黃老之言申韓之學彌綸六合翕然嚮風子長生當未造深疾流弊直揭其失無以爲尊諱隱規其過非以阿俗好其曰儒者博而寡要勞而少功又曰道家去健羨黜聰明與時遷移應物變化觀操術之工拙入道之險易儒家不必爲世所舐排而支離破碎可以斥其非矣道家不必爲時所慕效而陰謀詭譎足以救其失矣互祛其短交濟其長子長之用意抑何深歟或者不察以蠶室之餘生演柱下之奧義憤時疾俗準乎借鏡矯枉過正事若懸疣惑班史之警說違黃氏之緒言陳涉匹夫耳而舉博士則爲之敘

郭集三

十三

世家叔孫通腐儒耳而定朝儀則爲之述列傳田蚡以權位陵人公孫宏以緣飾欺世亦旣惡而絕之矣而蚡之黜黃老而延儒術宏之習春秋而拓庠序據爲典禮稱頌弗置班氏委瑣之見惡足以知之果其祖尙虛無畔離聖道文成五利何必悉著其罪也哉

南北史列傳家世例釋

夫錯綜往牒貫穿國史世家列傳併爲一書其南北史之體例乎蓋事兼八代父子相承遠宗司馬近效魏收故論其細也則名族纂詳語其粗也則流覽較易嘗者曰延壽狃六朝之習尙以閎闊爲主名齊梁陳之禪繼

不一而以宋世統之齊周隋之篡奪相仍而以魏事括之褚淵王儉何加乎劉宋王融謝朓反削乎蕭齊此其所以爲短也然而史家附傳義涉牽連劉交之於向歆荀淑之於爽悅家自爲篇代不數睹且固超兄弟也蔚宗未嘗並錄瑾恪父子也承祚不執常例區以別之如示諸掌抑嘗觀之人才旣多差池秉筆猶存軒輊度長絮短舍用滋繁外戚文苑意主增減孝義酷吏南北歧出窺作者之心雖改正朔不廢宗祊采摭羣言混成一錄猶乎集眾腋爲裘詎嫌補綴按六脈投藥莫泥古方必謂博而不覈費而無當治絲者益焚舉燭者屢誤不其苛歟但紀傳編年體製盍各亂臣賊子掎擊並嚴化及親弒其君而附入述傳世充旣稱僞號亦未克芟除揆以侯景之誅殊味正名之義至若取材收澹無復弛張江河共源衡霍同祀考其編纂意不盡然史偁延壽再入史局按勘秘文參究雜說手自抄撮歷十六寒暑始繼前修斯何其勤也是以修史者家法爲先論史者綜述爲要以年世爲遠近則國若奕棋以事實爲疏密則情同駢拇子孫遞敘體統斯明使事有所增代各爲傳不惟因陋就簡取誦重儻抑亦充棟汗牛轉混魚目以故歐公踵之以爲法宋祁譽之匪徇私相質披文固

其所也遷之八書類敘舊典固之人表尙論皇古鎔鑄
列代之文編次一家之學雁行魚貫人云亦云烏足以
盡撰述之能事哉然則通考全書發明義例家乘別傳
有未可輕詆耳

宋義論

夫旅進旅退者不足以定大謀詭得詭失者不足以荷
重任况乎狐鳴篝火鼠鬪穴中九州鼎沸三輔瓦解而
欲掉三寸之舌結七萃之心井蛙終困挾私智以自鳴
林鳥盡焚履危機而不悔其時勢之難易材望之淺深
又奚待問耶當項梁以鉏耜渡淮懷王以牧豎定楚政

郭集三

五

由季氏鮒入而鮒居國知穰侯蘭遷而鮑變主不過孤
注而冠履頓滄事不必覆軸而法令誰恤及乎持盈揣
銳用短棄長屠城陽略定陶圍鉅鹿趨彭城豆剖瓜分
增兵者六七波屬雲委干策者二三義以疎迷之臣運
幃幄之計萇叔違天決其必敗子玉多欲安禁速亡其
論武信之見戮智矣其沮高陵之及禍勇矣然而十圍
五攻鬪力何如鬪智三隧四義料勢尤必料情陳嬰之
辭大名一手難掩天下之目黥布之稱勁旅重瞳已蓄
無君之心使爲義者度德量力匿跡遠害沾沾自喜而
不爲福始銅銅如畏而不爲罪魁蹈東海以擯秦虜上

九下登泰山而小魯一縱一橫何至築壇場受鉞斧以
項羽爲前驅以范增爲右翼舉棋不定養癰之患莫除
對酒高歌噬臍之嗟無及身爲國殤名同叛黨一敗塗
地爲後世所詬病哉抑又聞之戰者危事也兵者戾氣
也批亢擣虛者一發而不可遏也老謀持重者萬變而
不可泥也謂偃旗息鼓轉敗爲功可以餌敵未可以卻
敵謂破甌沈舟因難見巧可以爭霸未可以定霸斯時
也趙有累卵之危秦爲强弩之末章邯軍其南而饋運
弗絕陳餘軍其北而烽火頻移王離宿將謀如泉涌涉
閒奇士戰如風發義挈數萬之眾以赴援畱四十六日
而不進猶曰承秦之敝解趙之嚴旣乏推轂之美未宣
挾纊之惠其爲羽所戕也固其宜矣然則義以爲堅守
吾以爲寡謀義以爲鉏强吾以爲釀亂幾見授人以刃
幸免駢誅齋盜之糧冀分餘瀝者乎且懷王之待義爲
已渥矣顧問至夕機政畢歸文宣謂崔暹無雙高祖舉
蕭何第一猛將起於卒伍貂蟬出自兜鍪拔距磔石義
旣不敢與羽爭出奇伺隙義又不能與增匹無忌之矯
殺晉鄙騎虎背而難下藺生之禮折廉頗附驥尾而益
彰懷王急欲除羽而義不能制羽勢也羽雅不欲下義
而增又勸羽以翦義亦勢也秦楚之際世教陵夷雄則

爲王雌則爲霸陳涉蟻潰田榮鴟張羽奮一匹夫之勇
將五諸侯之兵徧漳南盟洹水坑秦降卒焚秦宮室恣
睢暴戾又豈義力所能束縛耶世之論者皆曰義之寬
厚可以興楚羽之刻覈足以覆楚而不知懷王之立梁
以收羣望義帝之弑羽以修前隙漢祖建一統之治而
絕六國之後其功過與羽相埒鴻門置酒若有天幸烏
江拔劍究屬天亡以高祖之梟雄幾爲羽所拑擊義則
一介豎儒謬膺上賞自伐自矜受禍尤酷人惜義不以
功名終吾獨責義爲勢位屈義之識不必優於增義之
罪蓋浮於羽焉

鄭注論

郭集三

七

夫媵媵脂韋者宵小之常態苞苴竿牘者末流之稗政
未有習舌調吻而不許人之私承意觀色而不獎人之
惡其始也戢屨杖策善於揣摩其卒也引繩批根巧爲
施報頓使遷蘭變鮑嗜甘忌辛運笑裏之戈矛觸腹中
之鱗甲草頭木腳機政畢歸吉網羅鉗黨援爭樹如唐
之鄭注其人者可誅也尤可畏也安史之亂唐社不覆
亦僅矣西頭勢重佞臣久已典兵南面權移天子但能
守府注以訾讐之凡材煽蠱惑之烈燄飛丹鍊藥王珣
自比俳優鬻爵攬權鄧綰幾忘笑罵而况假九鍼之術

角五診之能扁鵲不能襲其奇容成不能盡其技十哲
羶附乎胥門三穢蜂屯乎京邑萬安一篋竟獲宣麻元
慶十錢始能判事注之傾險卑佞又豈王璠賈餗輩所
能揣測歟獨是王叔文之傾軋既擾於前李宗閔之陰
很猶熾乎後文宗志在復讎政先屏惡巍巍媧相尙擁
虎符斬斬小人忝膺魚袋五均六榦茶稅之利專矣迴
廊曲沼土木之役煩矣外制柄臣清選名選而銓敘滄
矣內參奄寺東軍西軍而守衛密矣使其表正摘奸簡
賢賚士豎刁工媚霸略未損乎齊侯籍孺善讒雄才何
挫乎漢后幾見變生肘腋血濺黃門害中腹心泣攀翠

郭集三

六

輦五百人依然潰散十一姓亦旣駢誅任水族以孕禍
攻巷伯而構釁爲後世所詬病哉科注之罪百喙何辭
稽注之才一長莫錄其附李愬也奚止面諛其舉李訓
也甘居首逆其交王守澄也狼狽爲奸終成反噬其陷
宋申錫也蜂蠆有毒孰肯曲全謂清君側之惡何進未
免張皇謂結中貴之歡种暉偏深感激盧杞貌寢雖眊
眊必報元載性貪斯賂遺尤夥金丹獻之御座而甘露
之禍萌犀帶賜自天家而彗星之警捷卒之貂璫負寵
方鎮籍權八校絲棼九垓鼎沸愈趨愈下以訖淪胥注
若有以導之城狐社鼠沴氣滋深銀帶珠冠黨魁固結

下皆側目而上益推心古今來獨一注耶抑亦可爲浩
歎矣

葉李論

士有負欽寄磊落之才際昏墊連遭之會元黃易位而
手無斧柯皂白莫分而心同汲綆運丁陽九敢云喪君
有君義秉在三安見可仕則仕冀勝恥食新莽之粟餓
亦自甘魏徵忍視建成之誅生原無補吾觀葉舜玉之
出處殊足異焉其始也惟道是適嫉惡如仇宰相無顏
沮延齡計安唐室儒生有膽斬秦檜以謝金人古誼忠
肝率八十人而詣闕蠻煙瘴雨踰一萬里以投荒未幾

郭集三

九

半閒堂側嬾鬪秋蟲潮居里前悲深海鳥國之感也亦
身之災也舜玉隻輪返楚一舸游吳慕嚴陵之山水更
築室廬覽太白之篇章爭傳姓字黍離之感蓋又過之
何以聲馳江左才需世亦世需才禮接禁中主擇臣而
臣擇主既奉安圖之書幣復招文海以弓旌平陳得一
姚察破吳拔二陸生機政畢歸恩賚無匹至若蕭何轉
漕建閩閱之勳樊澤論兵儲公輔之器發蒙啟滯采磬
石於交州強幹弱枝設籬櫓於隴右其圖大也如彼其
柔遠也如此然而勸農經武不減王猛之治秦寄命託
孤難效陳嬰之存趙崖山之戰宋竟天亡大都之遷元

仍地震向使墳典究心煙霞豁目落拓一官而何取乎
戀棧逡巡七辟而何鄙乎灌園則爲劉因可也抑或卅
年府史清白深恐人知百日中庶雌黃轉滋物議言爲
世用募酒誥之篇諡以人稱入逸民之傳則爲蕭轅亦
可也迺以羈旅之餘生荷興朝之大柄羊車入殿難酬
一顧之恩魚笏承家復重百朋之錫鯨布之歸漢祖非
刑不俟豫讓之擊趙襄以死自誓卒之僧格攬權獄成
瓜蔓李淦上疏象取棟橈雖青蠅之聞不行而黃犬之
悔何及比而論之前後異轍何其謬耶且夫遭逢者時
也開濟者才也褒錄者望也沖漠者識也使理宗下詔

郭集三

三

罪己之日誅似道逗畱邀賞之心蒙古雖強長江之險
莫越也金源漸熄五國之讎可復也奚至龍盤御輦世
傑恍慨誓師霧塞王舟秀夫從容就義舜玉不爲宋用
吾爲趙氏惜舜玉終爲元用吾尤爲舜玉惜耳然臣懷
落落大厦已傾天下滔滔狂瀾孰挽必執悠謬之談爲
苛刻之論則須眉太賤吳浚爲降將軍骨肉難拋孟頫
亦亡公子與夢炎較優劣當時已有定評並馬紹相後
先異代猶餘欣慕况乎甕缶無儲冠履不易徙江南右
姓而寢其謀聯交趾遠夷而布以惠觀所條畫具得大
體宜乎世祖愛之寵之而似道擠之竄之也

流品重於晉宋亭林論之詳矣愚獨惜世隆則人知以禮自防道衰則俗盡因勢而附奸宄鴟張權在征罰豎儒不能執爰而武將曰驕縉算蜂起利在錢刀寒素未能入粟而賞郎曰貴賞郎貴而權相尊武將驕而瑞禍伏彼則鬻爵於朝此則殺人盈野編氓之脂膏何足惜朝廷之祿養何足多轉戰十年糜餉百萬車馬宮室僕妾信麗都矣而不肖之夫慕榮之士承其顏色答以篇章其唾面也以爲吐哺其箕居也以爲倒屣是安怪其驕恣自如而士氣沮喪哉其以貲補官者人尤畏其多

金或通譜以要之或操贄以從之位不論高下意謂通有無究之官腥似銅人慳比鐵以勢交者與勢俱盡以利合者惟利是趨今昔一轍是可慨歟頃者國運中興人才輩出領師者皆名儒碩彥籌餉者惟額稅捐釐薄海承平敘功惟穆兜鍪甫脫巾幅自夸豈意八州作督不棄擄捕千金買姝莫藏謫扇肩輿則禮謁以游宴會則號呶不恥居則武斷鄉曲出則睥睨百僚若此輩者何可與一日居也至於以名器爲稗販以末秩長子孫其出仕之初心非屬國與民也安得不汰其賢否簡而用之哉在前代朝儀有廣三途之用有設十

科以取流品之分不必專屬科目第以儒爲席珍廉隅
砥礪守身不思圭璧涉世已卽泥沙門牆不峻則爲勢
家之鷹犬崖岸不立則思當道之豺狼及名裂身敗之
秋而後太息痛憾於仕途之絆我也抑亦晚矣然而士
生今日飭身入官猶有難焉者中原之財力敝矣外洋
之覬覦深矣欲列名臣先研洋務洋務有二大端其言
守備則輪船槍礮業患其不精其言興創則電綫鐵路
事患其不濟非精與濟之難亦度支之奇絀耳當斯時
也使有析利如桑羊募財如卜式備邊如衛青霍去病
則遷流又安可窮耶吾滋惡焉

郭集三

三

常州駢文宗派論代

夫漢魏文體同祖風騷振逸摭奇律凡三變沿及有明
意製相詭

聖朝龍興異材駿發吐言天拔厥惟迦陵樹蘭成之骨
而清捷有餘孽子安之華而彬雅可誦以故林蕙連鏡
僅稱後勁善卷拔幟未敢先登此固言泉會於九流楷
模懸乎百世抑亦盛已圃三嗣起富豔難蹤揚班千賦
善爲屬辭沈宋五言工於應制若乃孫洪並馳如驂之
靳穉存閱麗較崩如爲優而幼懷子齡得父膏腴尤足
述耳味辛盛藻導乎清源指物呈形風標獨著皋文思

鏡不假雕梭惜哉早摧未竟厥緒申耆養一冠絕當時
連類龍鸞抗聲金石窮正變之原張質文之統蓋其所
輯駢體文鈔一書已條舉眾例矣金匱二楊蓉裳獨步
巧心研手玉馱金羈況以樊南蔚然深秀芙初輕麗個
乎不羣繁文縟旨詎減才情典冊高文頗窘邊幅彥聞
驅染煙雲筆有波濤喜用新事不傷綺密此其長也陽
湖二董今之機雲移華擢秀丹黃成采蘭石漱芬宮商
協奏晉卿傑出不主故常意密理新詞高體潤試覽齊
物之鴻篇洵推茗柯之嗣響方叔輩行較晚聲稱最著
文約指明江左莫逮他如祁生劭文町畦待闢翰風子

郭集三

三

僑格韻未適立方明治佳構罕傳秋史恢宏警句蓋寡
總而論之飾羽尙畫雖非四六文之美而舉蘭采芑卽
在五百里而遙人握靈蛇之珠文續雕龍之論瓣香陽
羨無徒襲乎曰科取法卷菴尤必運乎杼軸思如泉注
智若瀾翻觀者忘疲鬱爲文棟然則舍英絕領袖之士
其誰與歸哉

西學通攷敘

代

夫習巴渝之舞蛾伏攄忱效扶南之珍象來致福齊斧
一麾籠罩無外此固盛世之大匡也至若因河爲塞累
石爲城斷西戎之脛繫南粵之頸列屯三十四部置驛

六十餘所介胄之士以撻伐爲遠圖摺紳之徒以和親
爲勝算玉關葱嶺三絕三通洹水版泉一張一弛邊釁
旣開兵端莫戢折膠唯患乎冬竄傳鼓尤重乎秋防腹
地頻侵舌人交憊以今况昔良足慨焉

聖清刷蕩通殘龕靖神縣廣招徠之仁守羈縻之法佛
郎機之居澳港旣誤於前英圭黎之擾淮陽仍潰於後
重以金田嘯聚髮逆跳梁碧眼虬鬚連兵內犯天津之
口血未乾淡水之咽喉竟斷朝和夕戰南北洋之蝸鬪
紛如先睡後醒東西球之鯨吞未艾迄乎中日一役而
支那之大勢蹙矣或詰愚曰處積弱之秋握自強之策

郭集三

書

莫如審三難調四惑攻入病祛十謬正學術以挽民心
嚴吏治以戢世變反本修古庶有豸乎慨自荷蘭互市
番舶蜂屯蘇祿修盟裸民蚊負訂恰克圖之界約勢若
轉圜草磨刀洋之捷書事同畫餅輸契丹之歲幣莫剪
狼心釋吐蕃之羶毳轉滋鳩毒則主和難又如鐵輪直
駛異王濬之樓船火礮橫飛勝田茂之雲旂恃其制器
之精以爲要盟之計虎門鎮海覆餗堪虞雞籠鴨綠債
轅足惜則議戰難俄踞朔漠日煽東瀛英旣密布爪牙
法且隱伏肘腋蕃使跋扈復畀以全權島國燕安僅劃
爲半主未聞斂袂以奉一尊安冀執珪而朝萬國則守

吾圉而捍外患爲尤難獨是鮮卑之種但解游牧烏桓之族不辨節候史家斷限立體綦嚴東夷起自鼈橋南蠻出於槃瓠舊傳已詳後修宜輟西國紀年沿於漢代踵基督之陋說逐羅馬之頽波十九周別開運會未免遠天億萬眾胥受鞭笞勢將裂土西人必曰一千八百九十餘年此其惑也公法之學違背尤多或以爲孔門之性理或視爲周室之刑書然揣彼雄心驗其狡技亦惟弱肉而強食遠交而近攻英墟印度俄滅波蘭日攘琉球法控安南公法又安在乎此其惑也至謂公羊折獄厚誣古人牝雞司晨變生宮掖西俗扶陰抑陽先配

郭集三

三五

後祖父子異宮男女同浴高句驪娶自河伯鳥卵浮來吐谷渾號爲恪尊龍祭迸散此其惑也大祝之辨九捧尙左尙右異其宜司儀之詔三揖同姓異姓殊其等西人不然何以匡俗接吻握手醜態畢宣摘帽搖巾詭狀可噱暹羅日本改服易朔此其惑也蓋中國一療夫耳膏肓漸入藥石難投腹心之疾厥有八端一曰租界沿江沿海市埠蟬聯一塵旣託百喙難爭臥榻之旁他人鼯睡毫毛不拔將尋斧柯信入室以操戈亦開門而揖盜一曰教堂耶穌希臘派別支分惡紫奪朱熾異端之醜鉏蘭傷蕙嚴非種之誅誘我黔黎驅獸入阱亂彼黑

白引虎出林宵小乘釁交煽長吏束手無策此四萬萬人之奇禍所爲歎息痛憾者也一曰販奴招工出洋情同獸畜略人墾土計效狼貪鹿豕我人民弁髦我國例漢奸作俑番官居奇美洲既釀亂萌秘魯尤滋虐政一曰鴉片罌粟流毒倍甚洪水痼疾已深菁華頓耗撫膺增痛甘之如飴變計太遲樂此不倦漏卮莫塞大厦誰支有剝膚之傷而忘濡首之誠鉅資外溢舉國若狂一曰關權齊正鹽筴漢算輅車自昔爲昭近尤急務值百抽十權會甚輕累萬盈千灌輸將竭而海關之制別立稅司既重幹官悉選番族輕本重末莫劑其平絮短較長莫糾其失一曰領事公使駐華星羅碁布護商爲名伺隙而動何嫌越俎逞一己之私寢假鬻權廢萬國之法一曰兵費吳徵百牢景伯弗應晉求重幣子產有詞今則索賄甚奢爭承無已脂膏盡矣如國計何一曰機器電車氣銃絨布軋花作彼奇淫淆吾耳目偏長薄技燦然可觀購器則浪擲泉刀實承其敝仿製則虛延歲月莫擷其精尤可異者擣摺古子傳會新學未克用夷變夏翻欲援引入耶老子韓非不當同傳尼山釋迦詎可並稱尙羊乎使犬使鹿之鄉渙浚乎爲魚爲鼈之侶語言文字改象形爲切音雜霸驩虞溷儒冠爲胡服謬

一君也者翕受九德出震而乘離臣也者矜式百僚瞻雲而捧日今必屈九五之尊從二三之說四時爲輔而潛察璇圖三畫連中而妄窺神器裂冠毀冕移九域而耀中天剖斗折衡沂八埏而燭上宙昧天澤之常分以草野爲定評伸民權而抑君權廢中法而祖西法鯢居鮒入予智自雄集矢羸秦熒惑民聽謬二選舉之志漢晉無聞諷諭之風虞夏尤美西國之創立上下議院君皆守府視若贅疣人盡爭權行同馴儻一闕之市載號載嗽一孔之儒誰譽誰毀馴至處士橫議或暮楚而朝秦物論沸騰竟吠堯而助桀垂裳雖云正己築室安見

郭集三

三七

有成謬三甲第乙第取士梯階大經小經觀人標準射策不乏董鼂撥科復有顏閔博聞強記八舉並登古誼忠肝萬言立就唐重墨試金著程文明祖龍興專宗經義襲半山之格律網一代之奇英言孔孟之言先識後藝學程朱所學有純無疵我朝守其舊緒屢獲真材徒以大雅不傳歧塗並騁剽剝儒墨割裂周秦僞學競鳴淫哇聒耳必欲斲方以爲圓因噎而廢食遑冀計之得乎謬四漢尙高節而黨錮之獄興晉善清談而排牖之禍伏唐則牛李之嫌膠結莫釋宋則洛蜀之派齟齬愈多維彼東林殷鑒不遠今欲合六大洲之賢哲而結爲

聲援甘受五不韙之惡名而寢成亂本聯絡學會庸有
補歟卽如外域黨禍環生尤而效之誰執其咎謬五周
官三百鳩鷺成行漢爵二十麒麟表績甲午之制匪拔
乎門資乙丙之科詎拘乎年格必欲汰冗員更舊典廢
十銓辨七等崇武階貶文秩擢宏羊於賈豎取鄧艾於
農瑣旣紊官常難逃清議謬六且夫草纓菲履者上世
之隆規也鈞金束矢者霸主之稗政也西國減筭法而
主罰鍰擴獄市爲準城旦兩造所爭一以律師爲斷袒
左袒右終覺偏枯疑重疑輕必至靡敝警讐之人好鬪
健訟武斷鄉曲情何以堪謬七黷武窮兵西人慣技日

郭集三

三

本背約蠶食朝鮮

廷議保護舊藩聲罪致討日人燬我師徒掠我土地俄
則外示以誠美則陰掣其肘愚者不察謂萬國弭兵公
會一約於法之巴黎再約於英之倫敦三約於意之羅
馬犬牙相錯牛耳共持十七國定太平之局百千年懷
雍睦之庥然而俄土爭衡環球震動血流標杵漠不相
關和約之難恃也明矣謬八賦重則巧籍隱年政煩則
溫戶避役丁錢何判乎僑流甲帖何藏乎土著西國重
徵身稅藉濬利源谿壑難填姦宄變發頭會箕斂奚以
懸魚鱗之圖口錢穀租奚以編葡萄之戶謬九若乃帷

闈之內甚於畫眉馮敬通受制於忌妻裴延儁結愛於健婦王嬀豔麗以禮自持東施粗醜惟顰是效西國婦女露臂徒跣狃於舊俗必謂蓮步誨淫錦鞵賈禍漫夸天足轉蠱人心國威之不張實由纏足之爲虐謬十愚聞而听然笑曰井鼃不足以喻海其識卑也秋蟬不足以語雪其見拘也子知西人之僥狡而不知西學之殷昌子知西國之苛殘而不知西政之研覈子知西事之蹊淺而不知西教之雪煜有欲操御水御風御電之權能弗資乎火車氣船乎有欲探攻木攻金攻石之蘊能弗究夫蒸汽開鑛乎有欲安內攘外抉奇制勝能弗采

夫海軍槍礮乎有欲專對有才聯邦締好能弗審夫交涉游歷乎有欲候時轉物督繩削墨能弗攷夫商戰技藝乎有欲棄舊尊新采風問俗能弗創夫學堂報館乎又況時事多艱強鄰壓境改襟之雅化難期洗甲之雄圖益渺力均勢敵英之異志早萌貌合情疎俄之陰謀盡露法德初非交惡而併力以圖中原奧美置若罔聞而乘機而窺內釁牛莊之戰奪船折械非倭能運其強有曠之強者也馬關之約償金割地非倭能收其富有導之富者也南帝北帝虎踞熊蹲紅人黑人狐疑糜怯上侯應邊備之議使過不必使功績鼂錯兵事之書鬪

力何如鬪智所幸鉤異述奇轉敗爲福值臥薪嘗膽之時爲亡羊補牢之舉銀瓊金船地不愛寶而鑛務脩矣風發泉涌人盡知兵而海戰爛矣踰山越嶺無跋涉之勞而鐵路辦矣絕國殊俗無闕隔之慮而郵政便矣他如闢中西之學舍譯英法之方言驢脣蓮葉合同文同軌而播太和班蘭侏離去異服異言而修雅度萬方舍哺四海歸仁以視分災救患呂相絕秦畏難苟安子駟從楚渺乎小矣何足述哉雖然知己知彼者兵法之妙機察虛察實者醫家之秘錄藩籬甫入趾高氣揚堂奧未窺神搖意沮抒殷浩書空之語咄咄偏人效張騫鑿

郭集三

三

空之談沾沾自喜狂奴故態依然博帶峩冠童子何知猶自握拳透爪貪膏附熱誰鐫赤嶺之碑護短憑愚莫飲甜谿之水有拔劍斫地之哀吟乏揮戈逐日之奇勇幾何不爲西人所竊笑也噫是可深長思矣
隱書十九篇敘

夫叔展有麥麴之謠公孫有庚癸之諾楚姬有龍尾之歎伍舉有大鳥之諷莫不迴互其辭離合其體矻治亂審權變齊異同祛翳惑罕譬而喻巧不可階比而敘之蓋亦偉矣然而隱書標目班固續乎歌謠諧讖題篇劉勰先乎史傳揆其義例權輿秦客之度詞截彼支流皮

傅莊生之緒論景宋崛起大言小言殷桓代興了語危
語無乃藝苑之笙簧書林之圭笋也乎爾其文質遞嬗
儒墨分馳辨白馬之白詎異懸疣炫愚公之愚轉相裨
販髡朔抗手孟旃反唇舖糟啜醢回黃轉綠廁天子之
弄臣渺乎小矣使將軍有揖客慨焉慕之斯固善戲謔
兮不爲虐兮者也至於日烏月兔倏成倏虧春蠶秋緇
一寒一暑開闢以前搏餘黃土鴻洞而降劫換紅羊倫
類於是乎燦陳文字於是乎孳乳禮樂如是乎明備律
令於是乎增損草木於是乎紛綸禽鳥於是乎翔泳天
何言哉吾無隱爾他若鶴長鳧短理有固然白往黑歸

事須對鏡擣少婦之流黃回文織錦加羈臣以徽纆獵
犬裁箋旣顯晦之不侔亦悲愉其若訴且諧之爲言皆
也謎之爲言迷也二首六身剖諸絳縣一來兩縫貢自
成周鮑照抽秘乎井垣高爽運巧乎屐齒簡編具在可
以隅反逮乎末造夸多鬪靡或崇尚乎讖緯或出入乎
稗官字竟爲妖史將斥穢萬言詮經而未足三語作掾
而猶多又其甚者鈎稽姓氏詆謨形貌蟲入張奉之腹
驢削子瑜之面辨則辨矣蒙有猜焉頃以懷鉛之暇晷
討射覆之餘波璧績經子汎覽雜說得如千條都爲一
帙雖復病乎薦紳終有賢乎博奕言近指遠何嘗鈞太

史之奇語曲義賅匪必志齊諧之怪造八萬四千之寶
塔阿育神通擲三百六十之擣捕狂奴故態世之覽者
如謂謬辭抵戲無益箴規則覆子雲之瓠可也抑謂鄙
諺會俗意在拮拾則賣廣微之餅亦可也畫混沌之眉
已而不已卷巴人之舌斯焉取斯

湖南新建孝廉堂記

夫鄉舉之典著在周官計吏之名沿於漢代斯固隨才
銓錄最殿皆明舒翹揚英興能崇樸我

國家之嗣統也援六條以拯淹滯執九品以定清濁臧
名負俗篤學異能莫不象觀國之儀懸語郊之法烝我

郭集二

三

髦士縻爾好爵雖宋璟之畱銓二千祐甫之除吏八百
殆無以過焉然而科編甲乙榮拾青紫吹笙而奏鳴鹿
網珠而握靈蛇將毋食慙畫餅鑿滄止水月露風雲僅
事雕鏤名法幹濟日見廢弛此嚴羽所以齋函黃穆所
由投板歎況乎西夷互市天下多故或挾備邊之策或
守和親之約謀謨幃幃端賴異材禁暴戢兵斯其要也
粵在

中興之際湖湘人士勇氣百倍江左諸公皆藉孝廉起
家焜耀當代卒能巨難削平

王猷允塞日闢百里粒我烝民論者美之曰其必剛柔

兼裕仁智並施者乎然非

神武之朝莫覘偉績而貢舉之澤捷若轉圜惟是中丞
吳公創立精廬最以文藝下問不恥而撞鐘必應英峻
崛起而屢照不疲則見儒術振興風化嚴靜師旦之下
浮豔黃裳之拔孤寒不亦偶然遠乎或者不察以龍門
目之以雁塔要之則亦異矣

與曹劍誥書

湘城判襜寒襲重裘海嶠懷人秋生團扇雖漢皋滬瀆
字疊錦鱗而蜚雨蠻煙恨添畫鷁正月三日附輪抵港
遭撞船之厄乃知吾弟於元日比鄰失火竟筮棟橈僕

郭集三

三

之不遇陽侯與君之能徙曲突有數存焉可无悶已頃
者奉洪江芳訊別夢依依雒誦再三轉縈愁抱志正自
到穗垣都無聊賴隨軺往返暗記郵籤初入端溪未攜
雀硯繼趨瀧水爭揖雲巒泊夫訪峽山飛來之寺謁曲
江文獻之祠目眩心怡略祛塵瑱無何幽憤雜填舊病
竊發調粥秤藥屢費周章撫己憂時信多惆悵方今
廷議變法時局日非改制藝爲策論寓選舉於特科宰
臣則罷秩歸田處士則違道干譽九州鼎沸一國若狂
以目前之形勢揣之不使震旦變爲古莽支那皆成裸
壤不止伊可畏也慟何如之足下遠羈僻縣兀守冷官

藉青氈爲長物還課兒書續白華之逸詩近承親意較
志正之子然一身浮楂萬里寄人籬下候蟲仍自悲吟
負書車前措大毫不能事榮悴異迹利鈍殊途靜言思
之足下亦當搯腕夫頽波莫挽害有踰乎洪荒異學競
鳴患有烈於猛獸馬鄭之箋注張蔡之文詞韓歐之史
筆朱陸之性理舉而裂之漸滅殆盡煽暴秦以餘燄投
名士於濁流豈僅天津橋畔聆鶻屑涕荆棘餘生指駝
增感已耶或者未達故智自矜幾欲操入室之戈措已
傾之厦以莛撞鐘如水激石抑又難矣志正幼而廢學
壯竟無聞以揚雲寂寞之年抱鄧攸無嗣之戚况復稟

郭集三

三

姿乖異遇事齟齬端居寡權論交最窄曩歲曹生邁疾
不祿今茲翁子又阻黃墟睠彼友朋能無腹痛南中氣
候不齊頗難調攝殘冬恆燠可御單袷盛暑淫潦須展
重裯市廛湫隘言語侏儻盤蔬乏味室宇霉濕飽啖則
病日食二頓不過三盂沐浴有忌漫膚多汗未敢輕拭
飢蚊白晝來相屠怪鳥清夜而驚睡鷄聲喔喔而耳傾
柝響丁丁而心碎火礮旬旬檐際曉破涼飈慄冽枕上
潮生志正野性難馴褊衷嫉俗匪云圓土彌月未曾入
市匪曰雌黃啟口輒疑罵座炎洲鬱鬱安能久居秋草
萋萋付諸寤歎試院窗側有甘蕉五六株修竹八九挺

每值風狂雨驟之辰便作翦韭篝燈之想君依獠峒高
曠絕倫我履狼荒憂勞誰訴兩處相思愧無長房縮地
之術千里命駕願抽希逸賦月之句銀漢如洗蟾魄簇
新搔首踟躕肝膽共照虎頭癡絕惟足下箴之惜之

與王生書

靖宣足下俗學紛呶大道梗絕永嘉五厄復睹今日塞
聰緇明三用浩歎夫張侯鑿空譚者動容史公鈞奇轉
滋詬病駟行之湖九瀛聊自逞其談譎劉晝之賦六合
識者斥爲大愚今之習尙爲何如哉視六藝爲糠粃屏
百氏若贅疣驢脣蓮葉謂足奪倉籀之巧梵夾悉曇謂

郭集三

三五

足證周孔之闕旣忘異言異服之誠復侈同軌同文之
盛彼倡此和愈出愈奇博辯以文其奸危詞以飾其陋
激昂忼慷以要結乎達官號泣太息以震撼乎流俗科
舉之制變矣而剽竊綴拾之弊彌夥遴選之途廣矣而
貢緣干進之漸已伏何耶擯古競今是丹非素閱報章
三五紙便誦通才摘和約一二條羣推碩畫決科發策
皆市井稗販之夫交聘往來半胠篋探囊之客可勝慨
哉可勝慨哉足下息影巖巖銳意鉛槧攷鏡舊史孰得
孰多仰接時流或賢或否甲第乙第非夸稽古之力矧
在季世農經酒經自遂養親之樂矧在妙年僕實無狀

囿於舊學上馬擊賊雞肋不足飽老拳仰屋簪書黃金
豈能享敝帚邈然古不可期悲哉秋之爲氣寒蟄滿地
欲碎唾壺明月在天難澆杯酒足下冲襟獨闢古籍冥
搜唯孟晉以迨羣勿蹈吾之覆轍幸甚幸甚志正白

首山懷古賦

并序

舊說伯夷叔齊隱於首陽恥食周粟遂餓而死不知所
謂餓者義不受周之粟貧餓以終非真絕粒而死耳莊
子又謂伯夷死名於首陽之下語已迂誕史遷直謂夷
齊槁死竟無天道激薄俗愍高躅其憤懣尤不能自己
愚嘗讀其傳慨然想見其爲人援筆爲之賦其詞曰

郭集三

三

溯墨胎之苗裔擊首戴之遺蹤棄萬乘如脫屣怨時命
之不同去孤竹而遠遁慕西伯而見容泊鹿臺之盡焚
遷九鼎於鞏洛合殷庶以宗周定五等而班爵二子聞
而涕零覺簪纓之難縛登西山以自溷攄由光之逸志
今旣是而昨非我獨醒而眾醉載木主以東征秉白旄
以指麾扣馬首而亟諫雖鈇鉞其奚辭屏周粟而弗食
采薇蕨而亦甘周有亂而紀十殷有仁而成三惟春秋
之建國隱代桓而互爭踰百世而莫改被弑君以惡稱
笑子雲之投閣終劇秦而美新玉有瑕而見斥蠖因屈
以求伸彼魯連之蹈海激切而恥帝秦及田橫之守義

居島國以戕身比而觀之又烏足云至若山爲周山何
待躋攀薇爲周薇何必甘肥以世俗之管測決達人之
從違沿譎踵謬未能闕疑將見讓國而逃知難而退不
其餒而紬漆園之目論士以烈而殉名厯千載以永譽
究無當乎聖心繫龍門之屢控託尼山而益彰知趨舍
之有時附驥尾而難忘跖嗜殺而齒高回修仁而運短
信天理之無憑疇持盈而戒滿嗟末流之混濁少所見
而多怪必仁至而義全處窮乏而奚隘重曰黃農非古
兮叔季匪今委國而去兮得氣之清以暴易暴兮猶持
異議求仁得仁兮絕無疵累武庚在邾兮父師在夷王

郭集三

三七

燼可煽兮警說紛馳夸者死權兮貪夫殉財詭得詭失
兮孰盛孰衰麥秀漸漸兮目倦心搖松柏翳蔽兮歲寒
不凋河曲之中兮華山之北片石峩峩兮林深月黑山
魑逐隊兮猿聲悽惻廟食僅存兮唐虞舊域我本楚狂
兮景仰頌行忠君愛國兮發乎至性澤畔行吟兮後先
輝映香草美人兮千古同病

辰龍關賦

辰龍關者常沅之障蔽溪洞之咽喉也循沅陵東百三
十里長城豁險林麓黝儵駮駮崛崎高插雲表隱麟鬱
壘僅容雙馬哀猿不鳴怪雨如注絕壁千仞白日蔽虧

俛仰之間鬢毛凋改況乎秋風颺瑟閱秦漢之興亡銅
柱嵯峨弔沅湘之割據煙集風搖龍戰鹿駭能不撫今
追昔愴然擊涕者乎其詞曰

南服雄都西陲大郡複嶺重岡排爲疑陣雙岸巘岈萬
峰嶮峻猿獍莫踰猺獠效順亂石爲之右拒馬鞞爲之
前驅如狼當道如虎負嵎上覆叢箐莫窺其邃密下臨
深澗莫測其盤盪固已跨躡五寨枕輻一隅者矣肇闢
蠶叢厥惟神禹分北三苗隨刊九土德浹盤瓠威來荆
楚再叛再征一取一與嬴氏銷兵馱舌逞強炎漢遷鼎
交趾跳梁巍巍伏波遠征弗庭飛鳶六月匹馬萬營鏡
歌未闋刁斗不驚薏珠莫剖芒刺遽深弓藏鳥盡苔蝕
碑沈及乎殷範耀武蔑視百王據榔桂略沅湘瞰洞庭
削衡陽簡僚佐鑿餘艘築碣堡破氐羌刻石琅琊勒銘
燕然薦功告類置屯墾田信能役乎三十六國又何解
乎億萬千年銅狄摩挲非舊物矣金刀淪棄非一姓矣
咋愕嶮岈山不挫其銳矣砢汎輞軋水不減其勁矣斯
關也鐔以大峒軸以危墜炎猷夏收沍寒冬臘一顧盼
而萬木低一警欬而羣山應古不必視爲畏塗今不必
入乎陷穽閒道出奇何論乎孫吳之兵法異辨縱橫何
取乎蘇張之霸業以力相搏以威相脅匪不決勝乎巖

疆終遜雄關之岌業一夫當關萬夫莫開銅梁失其險
隘峭函渺若浮埃田文之度關也慚爲雞口伍員之敏
關也溷乎輿僮臧孫拔關輸其勇齊景毀關阜乎財以
茲較之噫亦危哉關以龍名龍以辰顯龍之伏兮曲阪
幽林龍之躍兮天梯石棧龍之從雲兮傳翼能飛龍之
化劍兮無堅不剗攀龍者阻乎懸崖參龍者悵乎絕巘
迄今城擁受降寺標歸化毳幕

恩鋪繩橋

威迓嚴鼓相告累石爲城湘羅傳檄廬九掩旌銅平慕
義蠟爾攄誠冬屯致穀秋防去兵五里一侯十里一亭

郭集三

三

肥王蛾伏酋首蛇行齊民庶富寰海澄清雖隩區之係
乎地利要無取乎劍閣石關之銘

辰龍關後賦

向者述辰龍關賦疏九溪之險要次五代之馮陵意旣
殫矣伏思明社之淪胥

國家之定鼎逆藩負固遠竄滇黔旣而僭號衡陽奄有
南服康熙之際吳逆頓軍於清捷河扼關抗守勢難仰
攻逆黨伏莽已久焚掠民廬塗炭黔首民皆獸散賊益
鴟張有向夢熊王玉美蔡斗還者潛詣

王師指陳閒道十九年三月向引蔡將軍軍由高崖入

繞關之左蔡引桑提督軍由細溪入略關之右金鼓沸
天礮聲震野而王又引郭總兵軍搗其巢穴於是辰郡
肅清滇黔歸附勢同破竹捷若轉丸不亦偉乎二百年
來蠢茲苗眾雖乘間竊發抗我

王章而大吏出車溪崗崩角髮酋授首邊圉宴安此以
知地利之不可不審亦

天威未有不懍者也馬氏父子時際傾隕遙執國柄妄

自尊大固其宜也吳逆則躬覽

澄清爵備方鎮希冀非常梗

天之命襲偽尊號垂子若孫視股範爲尤悖矣卒之身

郭集三

早

敗名裂爲後人所唾罵亦何裨哉孽志乘之遺篇采父
老之聞見演爲後賦以闡宣游之旨云詞曰

聖皇之大一統也歷五帝之寥廓狹三王之趨超北燮

丁令西通巴蜀南諧越裳東裁瀛曲而乃強藩絕命控

黔帶滇創建僞號是爲衡山逆嗣萌蘖扼守雄關長壘

後濠瘴雨蠻煙匪曰克之如子午谷之據乎險匪曰不

克如廣武原之持乎堅翳深溪者五若蓄異志者十年

雙崖對峙萬夫卻前此吳逆之構豐辰沅幾莫獲乎瓦

全書生獻策大將搴旗風馳軍謀雨沛

王師高崖掠乎東細溪搦乎西斷清捷之臂腋伏一軍

乎滄溪鴻洞繞獵如刀割泥鮮扁駢衍似鷹嚇雞簞食
壺漿無所拒子女玉帛無所攜此

熙朝之武德亦蠻部之端倪也三藩於是乎土崩四海
於是乎永清可以測地險可以屯邊營可以吹齧粟可
以築金城前之所謂煦恩者今則息吞并矣前之所謂
定

威者今則釋紛爭矣蛇豕一變爲麟鳳鏡錫再變爲韶
謏舉夫穿胸椎髻靡不仰峻敞而奉

王靈彼強臣之跋扈偏安以自侈又奚足稱

草書勢

郭集三

聖

鳥跡始變草聖乃生或曰史游實創或云杜操所興甄
豐六體厥有繆篆由漢溯秦繇文遞衍白魚嘉穗集於
上世取夫效奎閭乎籀隸崔杜先鳴張趙嗣作索靖子
雲善窺大略懷素觀雲智永瘞筆左矩右規裏文表質
張旭沙飛鄭虔風送屈玉垂金攫龍團鳳若夫體勢高
妙點畫紛拏縱橫駭獸錯落驚蛇或危峰墜石或長劍
摩天或怒霆擊柱或奇瀑瀆泉或候蟲鳴秋或瑤草鬪
妍遠而望之心亂而目炫近而察之意會而神全透奇
姿於紙背合契匠於筆先鋒鏖外挫骨韻內涵子良辨
六鍾繇善三惟觸變以成態舍懷瓘其孰譚

郭明經遺集卷四

述懷十首

瑾戶以禦風人悼冬時短我意殊不然於冬偏疏緩夙
興仰天霜隨意事櫛盟墨池染素牋造次加餐飯問字
環廬清假寐隱几穩起誦詩琅琅口角珠璣滿雖減酈
其狂已習嵇康嬾旁觀遙相質子來席甚煖含意未及
伸身被古人管

古人在何處啟卷長咨嗟問君何獨爾綠竹有根芽根
芽日以疏綠竹日以加措天淨雲霧浴心吐明霞殷勤
苦不得設想孤梅花

郭集四

前年買折枝分插膽瓶中花開如雪白瓶煖愜春融小
窗迴日影二月餘東風如何雪意催芳心尙俟通

屋前聞兒啼屋後濯釜響而我居屋中昂頭勞幻想時
事東南急男兒貴意廣使我臨軍戎何以副骯髒一旦
文字重姓名辱蕊榜花縣委簿書村難立民長故觀聖
賢志素位將心養禘說知未知兀自指其掌

新詩如美人心動快一瞥及其竟綢繆轉使厭心發越
時瞻他所眼燒腸若結無端阿憐至宿好頭中絕

天下數名勝古稱瀟湘好我家移湘江六年不爲少江
頭魚網雜江面垂楊小黑雲夜暑弱碧雪朝嗽老山靈

要未靈曉人如是曉

嚴風吹白日坐視華年徂十二月初旬月光漏徹廬鄰
舍喜有詞明晨宜道塗豈知素魄上聊爲晏歲舒四時
能幾圓一夜較常娛占晴信可必擬霜恐不如

黃鳥悄無儔默首熟音喚未意素心人相見各一粲鏡
下促膝勤袖中近作玩雙聲嚼一詞佳處著問難閒情
及漢刻都出時流腕取次行述翻微辭見區判茗飲漸
不支漏引歸懷澹寒月貼閨前交影地上亂慨言二三
子窘狀再三歎身世無所效復把流光算揭來立移時
快事畢有散無聊請後期關門月鈞半

郭集四

二

未傳李賀名已嘔長吉血共謂就詞章晨夜未嘗輟吾
生寡嗜好勉修成吾潔其他禍福緣中心素不屑畧按
有生初二十四歲月溫飽雖未期鶉菽幸無缺靈運腰
腳輕廉頗善噉啜遇山每心融逢書卽目悅世途信少
爭隨分安吾拙氣體當壯強胡然相迸裂所親示養生
且暫惜脣舌柰乎一息存吟興又蓬發

崇高久不思浮名今念休一女尙文祿作婦他家謀有
妻屬弱齡轉醮計最周椿萱都無有差免伯道憂叔嬾
臘雖高從姪得稽畱側顧我之身飄飄若輕舟聽天所
絆倒與世相沈浮忽思數同學神慘淚暗流試闡連床

兩湘城聯袂游蒿目攄心期樂談忘酢酬一日舍將去
翔雁空回頭學成慰我衷名華勝我收一飯矢冥報曠
無芥蒂讐顏冉皆先賢高文非俗修

贈敝袍

平居我聞阿叔言得君實自新婚初踰年卽充汝父服
寒晨雪夜未與疏忽忽春秋三十四君賴如斯父早逝
曩時姜被劇聯歡今日箕裘成底事我意要君以永好
我似嬰兒君襁褓只愁片片作秋雲鐙下剪刀干妻惱
十年以長禮稱兄爲煖爲涼均世情幾見寒門換隆替
君猶纏繆衷其身

郭集四

三

和郭景純游仙詩七首

次原韻

都門戀顯秩巖谷敝幽棲結綬非吾徒從師闢荒萊絕
嶺觀流霞青原采柔荑仙靈有夙根平地生丹梯吳市
披裘客於陵辟纁妻辭爲廟堂犧謝牧海上瓶重言究
莊叟生物何由齊

崑崙瓊華室常憩餐霞士靈瓜種雲邊火棗探袖裏向
願與之偕今遇赤松子洗伐莫計年鈞天靜俗耳峩峩
碧城高霏霏絳雪起江妃解玉珮微波啟皓齒青鳥竟
不來瑤池莫肯使

麟脯佐金尊廣座盡澄鮮綺蔥與赤薤交映自遠山道

人意何深陳琴復與絃明月懸崖閒俯然漱華泉王喬
訪蓬瀛控鶴凌蒼煙初平難繼武劉綱差比肩非矜養
生術聊樂大隱年

松柏本質堅容色有時謝精氣煉三華無冬亦無夏第
其蒲盧生不隨蟬蛻化石髓味如飴紫鸞思並駕凡骨
換未能冲霄避君舍頭銜碧落輕望風徒歎吒

靈谷足盤踞丹谿幸遨遊倚樹聽松聲泛乎不繫舟浮
名久相軋華簪未早投爲言蟠桃核千齡爲春秋何事
謫塵寰甘居墨者流

神龜畏日月背平不爲災體輕餌硃砂勝掇北山萊振

郭集四

四

嘯凌雲樓高築望仙臺倨佺揮玉塵安期進霞杯雙成
吹雲和金母爲解頤珊瑚曜銀闕仙風揚八垓究非金
丹力聖人自能孩漢帝太矜功秦皇枉用才

太陰有方士拄席拾素魄耳邊萬壑鳴足底一輪白朝
餉商山芝暮遺秦宮柏玉顏進胡麻盤桓忘昕夕詎識
青精飯皆爲金玉液華陽抽秘文支機獲奇石九色駕
斑龍高揖熊冠客

諸將

磨牙蜀犬出潢池八陣縱橫上將旗辦賊燧晨同受
詔論兵張岳不相師秦風肆好悲黃髮漢運中興擾赤

眉半渡蓑衣摧勁敵至今碧血濺江湄

三楚惟柳據上游妖星偏逐大江流呼鷹誰信軍烏合
養虎公然賊白頭越甲五千猶築壘魯師三百不踰溝
戰雲瀼瀼長沙道太息黃州與汴州

老鼠峽前飛火鳥三汊河畔擁瑯戈金陵王氣消豺虎
玉壘浮雲變鸛鵝堅壁法原參李泌持籌功已讓蕭何
大星終向丹陽落淚比朱仙鎮上多

沈江鐵鎖鎖朦朧王濬平吳第一功 廷議共知援武
漢逆氛屢欲竄舒桐飛輪挾浪船如馬長戟摩天劔化
虹杜牧平生好兵略秉旄大帥更虛衷

郭集四

五

枕戈越石切澄清自結湖湘子弟營敢死始能爲國士
大功原不誤儒生伏波身後猶懸革小范胷中儘有兵
慢道將材寄屠釣上書端欲請長纓

東征新例算舟車驕將從無畏簡書川陝徵求原易與
臨淮反側竟何如吳璘疊陣堪持久道濟量沙善擊虛
無柰天心未厭禍三河贏得是歎歎

祁門久駐近遷延誓掃中原馬不前安史滔滔同逝水
鄂裒一一繪凌煙降旛徧豎城千里羽檄交馳戍五年
龍膊已穿猶困鬪封侯爭羨面如田

三邊鼓角夜援號齊把襜衫換戰袍宗慤歸裝惟被枕

李公臨陣拔韉刀，種牆慘淡征雲合。銅柱嵯峨塞月高，
吞盡吐蕃四十萬。蜀人遺像祀韋皋。

誰誇三箭定天山，誰領偏師度玉關。十策屯邊充國計，
單騎見虜子儀還。霜戈直指謀先定，露布頻傳手自刪。
髀裏英雄消盡否，還從老圃話清閒。

傳聞烽火壓重洋，朝野紛紜議海防。趙括易言失雄略，
李寬宿將備狼荒。全臺飛礮千重浪，百粵鳴笳萬里霜。
和局終持兵力薄，莫因凱曲廢戎行。

薦新詩

嘗粢盛耐早秋天，一味新涼徹畫筵。漫共大巫談楚俗，

郭集四

六

萬家菱芡揜豚肩

中元景物最春容，剪紙招魂襲楚風。不解民間有憂樂，
箇中消息問柴翁。

幡花金翠獻盂蘭，百戲魚龍夜未闌。待到鉞樓涼月上，
游人始覺葛衣單。

蕭疏木葉洞庭波，雜記猶傳鬼渡河。銀燭兩行春萬樹，
朗州司馬竹枝歌。

紙陌紛紛蝴蝶飛，醮神禮畢送神歸。滄田變幻尋常事，
須識當年丁令威。

蟲聲切切蔽霜麻，故老欣然說食瓜。敬熟南豐香一瓣，

碧靄湧出金銀宮，
儵若邊塞馳萬馬。
蔽野但見旌旗紅，
又如鈞天奏廣樂。
叩金戛石按淵衷，
水火交擊互吞吐。
漂沈混濊省厥躬，
躔移一度較遲速。
渾儀宣夜未可同，
金鷄騰翥若木折。
環緝莫究始，與終豈真吾。
胷盪雲海狂走大叫希，
天功捫參歷井躡層巖。
俯瞰四極雲朦朧，
霞光上燭散芒角。
丹丸躍起扶桑東。

謁舜陵

姚墟奇表白虹垂，
舊史猶傳葬九疑。
斑竹自浮龍鳥篆，
蒼梧偏削鳳凰枝。
陶漁軼事河濱宅，
玉帛明禋后土祠。
敢把重瞳貶西楚，
鴻溝割據失雄雌。

郭集四

八

休論絺衣與雅琴，
古杉百尺雪霜侵。
典夔已播無聲樂，
誅繇仍懷遜位心。
八伯歌風雲管動，
三妃結珮翠華臨。
九州未易窺沿革，
記取揚雄十二箴。
承歡扞笠偏蒙難，
慕德如羶豈貢諛。
司馬重編五帝紀，
窮蟬已肇百王圖。
格苗不假三申令，
納麓非藏六癸符。
一曲卿雲賡復旦，
童謠何必戀康衢。

湘江竹枝詞

八景臺荒賸落暉，
劒江春浪白鷗飛。
釣翁倚舵碧雲暮，
載得西山明月歸。
三十六灣秋水生，
青菰貼岸柳條橫。
女嬃不解申申詈，

欲剖江魚問屈平

簇簇青山畫不如江風四月賣鱖魚偶牽鶴舫評盧橘
博物何曾笑子虛

鑿翠齊歌行路難布帆無恙北風寒舟人拍手鳴津鼓
已度沅陵百曳灘

榜童夷唱晚山稠迎權神鴉語未休耒水西流蘋草綠
尙傳疑冢葬鞞洲

鈎鐏潭邊秋草深柳公遺跡待重尋永州儘有佳山水
煞費詩人擁鼻吟

高唐雲雨事荒唐神女何嘗讎楚王一點青螺濃似染

郭集四

九

漁歌十里繞滄浪

洞庭南望接君山翠竹千年尙著斑那信春江惜離別
一甌冰雪駐華顏

城陵磯繞蜀江西碎浪盤渦岸影低過客未須談戰壘
濤聲萬斛撼征輦

佳節江村蒲酒新水塘逐隊壓芳津湘纍一去無消息
畫舸依然載麗人

孟蘭高設法筵開江面魚龍百戲排四十八灘風信險
篝鐙猶守太常齋

隴阪連年選楚軍征夫杖劔掃狼氛海疆久已持和議

雁字依稀滯白雲

豌豆胡麻自煮茶江鄉風味競相誇阿儂嬾更拈鍼線
詠絮居然學謝家

鏤玉鱗釵鴉髻盤城中新樣入時難香簪末麗涼風逗
月色裙拖瀟水寒

江千春老采茶忙茆屋歌風亂夕陽桑葉漸肥金翦落
布裙仍自繫蠶娘

石橋橫跨兩山懸桃落桃開不計年莫向漁人問風土
晉磚唐碣總茫然

鏡聽詞

郭集四

十

綠酒盈尊白堊扉殘年拚與寸心違朱顏詎易酬明鏡
雪繞湘江春未歸

菱生壁上鬪芳妍鏡屨纔抽已蹶然拾得搔頭魚媚子
曉風殘雪祝年年

一曲蛾眉歲火新愁腸消盡酒千巡屏風擬續蘭成賦
輸與秦宮照膽人

冰華掩映畫難成俗記燒鐙纖手擎喜愠一時都斂卻
賣癡聲雜踏歌聲

詠溪州銅柱絕句十八首

冶銅爲柱紀西征天策居然上將營望斷洞庭秋草綠

溪蠻猶拜馬王城

象浦龍編事渺茫遺文誰記伏波臧遙遙華胄渾難辨

割據中原舊戰場

鐵馬金人造語奇東京文物止殘碑那看九九百年後

破賊兼祛蕙苴疑

二十五行點化斜文摹誓誥字簪花貨泉鑄盡九州鐵

鑄錯從無歎帝艸

歐陽史例本春秋敘事矜嚴不濫收底事浮夸廢盲左

鴻篇仍向故書搜

天福天禧豈偶然南州誓狀靜風煙五都絕少流傳本

郭集四

十一

翟趙曾洪石未鐫

吳氏春秋十國排楚南王氣亦佳哉不馮石刻馮方志

研史何人逞霸才

崑山拓本贖晨星吳下書傭恰繫船一卷卅年還合浦

瓣香端讓曝書亭

池北從教數世家放翁記載等搏沙漫天市地皆卿相

誥敕於今酒不賒

公論難逃十駕齋讓王背晉政先乖大權久已歸藩鎮

始信戎功卽禍階

授堂題跋尙紛紜都監參軍兩莫分字刻數行誦萬遍

柱高丈二五千斤
酒囊飯袋尋常耳
幕府偏容曠代才
若把長沙較吳越
摩崖遠勝射潮回
辰澧非關據上游
百蠻太守亦千秋
豆其飲泣緣何事
獨力調停彭士愁
夷性難馴視此文
趙家猶策馬家勳
一封墨楫蠻陬服
露布何須仗傅君
糖橘馮誰采異文
方言原不斥烏孫
見溪同紐窮反切
六體形聲待細論

一姓仍分上下溪
蠻娃解唱白銅鞮
邊牆亦足樹奇節

郭集四

三

秋水寒生劍已提
南接犛犛西桂林
五溪部落劇崇深
細腰宮裏春如海
可惜神州已陸沈
紀功文字創先秦
銅狄摩挲轉失真
漁仲獨標金石略
談鋒未肯襲前人
上巳日游辰溪大西山

溪州山石皆鐫劖
大西一峯天際嵌
長江無風白日匿
攀躋已絕意未愿
有如騏驥產西域
鬻人不可受以銜
又如海潮猝然至
摩青十幅浮遠帆
鳥連回翔作餘態
劫灰飛落書千函
秦人一炬徒自苦
嗜奇莫療湘東饒

相傳堯時棲善卷石壁未破龍猶潛張果疑是白蝙蝠
杏花狼籍香泥黏望古作者三歎息標領新異快於鈿
道書福地二十六就游年少何不廉日臨上已愜幽趣
蘭亭禊事齊聖凡啼鳥窺人樹根密稱身已換芙蓉衫
坡陀厯盡三百級天荆地棘手獨芟五丁伸臂萬巖折
干羽舞罷修兵鈐苗頑已遷三危阻一卷竟能掃天機
及今

聖清垂邳治函谷直可丸泥緘蠻酋檢衽拜馬首安內
攘外託至誠區區珍重幾緇屐清譚季世無足矜南華
已誤養生主游心縹緲俗所淹但聞空谷發長嘯具非

郭集四

三

濟勝誰能兼

訪桃源洞

瀟水清且駛江樓片帆發言訪桃花溪綠蘿細如髮萬
樹含丹霞松杉盡突兀嬴氏尙督刻綺皓不我抗淵明
慕懷葛書空等咄咄漁人未可遇劉子亦銷歇何當攜
短筇蒼苔雨後滑

武陵春草齊漁仙寺鍾動一落千丈強瀑布懸石洞雲
斲青山青濤飛白馬白鳥歌十畝閒犬吠一溪隔修竹
作主人明月召佳客覽古晉宋前車輪總陳迹

卷舒天地心脫落神仙境謫仙白鳳皇終覺駭人聽花

開逐漁郎花落待清磬白晝冀輕舉衣冠笑優孟祖龍
得聞諸可以改符命

摩詰與退之一喜而一憎元輿得沈囊古畫窮窈冥矯
矯雲中鶴千年去何速猶及種桃人樹根展書讀潺湲
奏仙樂靜對砭塵俗羲皇既不作唐虞無可錄問桃桃
不言欽山瘦一束

蘋果

得甘字五言排律二十韻

果實林檎擅青蘋味獨探移春唐代植消夏謝公耽玉
井初浮橘金膏更擘柑頻婆依竹樹梵志禮蒲龕贈答
連珠擬芬芳五色涵名姬辭趙北佳士滯淮南巫峽波

郭集四

十四

猶皺姑峯雪正酣林家高價減江氏小名諳袖底指鉛
粉懷中墮碧簪綠添雙鬢穩紅暈半腮慙默默心情斂
纖纖手爪堪屏風輸曲記沈水共詩談已解相如渴難
捐曼倩慙微馨傳綺席熟顛摘筠籃遠道馳先荔終朝
采勝藍帶垂長樂宅花散紫雲庵漢篋珍踰百郇厨寵
接三粟非同蝟集桃豈借鶯含公幹方言篋元稹豔體
參來禽摹舊帖韻事紀分甘

老將

赤手曾提百萬師受降城外月斜時騎驢心跡酬中主
射虎動名逐健兒謫語縱難消蕙苴劍芒猶自辨雄雌

可堪繪向南薰殿簌簌秋風鬢欲絲

老兵

也曾青海掣靈鼉未惜千金換寶刀
萬里函關仍荷戟廿年雪嶺更投膠
生禽頡利神偏暇死傷要離氣自豪
聞道匈奴窺雁塞思量笮馬與蒲萄

老吏

簿書鞅掌力能勝憔悴何勞問許丞
薄俸難償五斗米新銜合署一條冰
任教策士頻捫舌不信良醫竟折肱
俯仰平生慚老大剛腸無奈變模稜

老儒

郭集四

五

賃春誰羨熟因人畢竟儒冠不誤身
點竄圖書猶近古遭逢草莽自稱臣
高懷夙昔耽周孔的派從容續洛閭
莫笑龍鍾衰更甚鶴書猶待擁蒲輪

老農

寸田尺宅太蹉跎爭誦南山種豆歌
古禮春王思緯未逸書周室紀歸禾
公旬趨赴憂勞少兒輩分甘樂事多
結習煙霞芟未盡翻教物色徧巖阿

老漁

秋風吹冷芰荷衣鎮日持竿坐釣磯
荇帶綠時牽半艇蓼花紅處掩雙扉
生涯但覺煙波闊樂趣偏憐雁鷺肥

賣卻鱸魚沽一醉放歌須趁月明歸

老婢

鄭家雅謹紀泥中惆悵青衣賦最工託比薦蘿原擇木
生非鸚鵡詎移籠翻羹未免窺人意恤緯依然執婦功
荆布由來貧賤好白頭今屬可憐蟲

老妓

送客畱髡興轉閑潯陽猶費四絃彈誰云一顧傾城易
始信千金買笑難繡箔翠垂秋色淡舞衫碧沈酒痕殘
都知錄事名多少輸與楞嚴靜夜看

老馬

郭集四

去

嘉名曾錫紫驪駒斗覺秋深塞草枯萬古山川增閱歷
半生筋力盡馳驅丹青自昔推曹霸任俠於今讓灌夫
伏櫪未須愁齒長驚人省識一鳴無
和杜少陵秋野五律

秋色望中迷浮家近瀼西天空幾雁度野迴一猿啼橘
顆參差屋薑芽上下畦擘時應起舞誰復感鄰雞

大隱名先累端居鬢漸凋生涯託萍梗逸響發咸韶山
好雲停屐溪清樹挂瓢思量祛老病賸有酒徒招
節物暄寒換憂虞旅況增松聲撼笏舍茶影澹孤鐙擾
攘時難展疏狂俗所憎平生蓄奇抱轉愧百無能

木落峯相接霜高鳥不喧
晚砧擣涼月殘照羃荒原
既涉瑋琮谷仍窺竹素園
羈棲爰得所何事叩桃源

已分衡茅老偏逢籬菊開
秋風應有淚巫峽自多才
射虎功名賤騎牛歲月催
昂藏三尺劍恩怨未須猜

龍舟詞

并序

蘭橈波蹙纔逾修禊之辰
艾酒香遲倏屆賜衣之節
蛛絡旣密蝸鳴欲聞臨流賦詩
伊可懷已況乎長沙卑溼
汨水滌洞玉佩瓊瑤難邀帝子
芳洲蘭茝更失纍臣九辨纏綿
頓釋懷沙之怨三年棲息孰傳
弔屈之文於焉傍淺渚泛輕船
樹朱旗擊鼉鼓菰葉蒲芽纓能
益智舞衫歌扇酒亦澆愁含風
壘雪流連杜老之吟出浦穿波
點綴駱丞之序遠慕前修用摠
短詠

畫舫朱幡閱令辰
香車寶馬壓江濱
沈沙莫釋湘纍恨
輸與陳思賦洛神

輕便疑駕采蓮舟
拍浪憑誰狎白鷗
漢幟排成拔趙幟
千軍一笑盡回頭

帆檣直度橘洲西
咫尺雲煙醉眼迷
猶記長江牽戰艦
從教過客感征鼙

五月滄湖水不波
靚妝來往麗人多
江南風景渾相似
團扇裁成桃葉歌

泛鷁恰當新漲活攀龍未覺碧煙橫蛾眉畫出遠山妬
三十六灣湖月明

居然破浪更乘風急管繁絃聽未終舊怨不須拈楚些

劍江春晚石榴紅

擬尹子莘秋興

有引

子莘以邊才自負撫時攄感慷慨激昂朔野一集流傳
絕稀秋興諸篇音節尤壯朱氏明詩綜沈氏別裁集均
止采四首而朱錄銅龍春闢曉光寒一首沈選萬山環
合蔚州城一首互有出入頃者海上用兵轉輸孔急追
步原唱都爲五章並次其韻尹之所詠不必同乎杜陵

郭集四

文

今之所擬亦不必同乎朔野邊城曉角古戍清笳有餘
慨焉

薊門秋老陣雲寒葉卷西風獨倚欄海塞鯨鯢偏怒吼
巢傾燕雀敢求安輸邊下式仍辭爵破虜淮陰尙築壇
不重和親重撻伐漢庭平勃已交歡

由來馭外視居中脣齒相依九服同百結邊衣眠夏雪
萬羣胡馬噴秋風北山獨惜馳驅久東國仍憂杼柚空
魏絳和戎終失計亡羊誰策補牢功
邊警頻傳赤白囊英雄事業儘僑當子房決勝踰千里
李牧攻虛守一疆霹靂頓聞沈鐵艦魚龍爭欲觸銅牆

雁門又報匈奴近軍政終成博奕場
短衣匹馬願從軍說劍揮戈愧未聞邊吏尙思增兩稅
豎儒翻欲訂三墳墨磨盾鼻雖無補秋入笳聲已奏勳
爲憶東山謝安石舉頭時復望卿雲

梅榆爲塞石爲城軍築神威氣倍清但使戈船浮瀚海
頓教烽火撤周京款關擬獻長楊賦置驛宜連細柳營
見說允文能卻敵大功原不負儒生

題江建霞學使藏馬守眞墨蘭畫卷

秦淮十里煙縈綠玲瓏爭唱金縷曲爲蘭寫照卻羞蘭
阿儂別撰小名錄掃眉才子女相如一卷離騷解得無

郭集四

九

但將澧芷江蘼意幻作滕王蛺蝶圖篠竹風枝尤嫵娜
石補奇疆秋病可墨汁淋漓八九竿筆花璀璨三五朵
冰雪肌膚斷石腸冶葉倡條空所有旁人錯認章臺柳
朱家季布究何負王郎老去擅風情小園飛絮報春深
妙舌偷鶯歌扇窄纖腰擢燕舞衫輕舞衫歌扇春光醉
銅馬六州已鼎沸板橋翠影盪斜曛曼翁浪跡何足諱
顛老琵琶信絕倫安娘詞曲易銷魂一種閒愁拋逝水
一條歸夢付浮雲瓣香猶數顧橫波卞寇盈盈潑黛螺
蘇小天才殊駿厲崔徽人事總蹉跎蓮萼青泥耽淨業
散花參透紅羊劫休論鞭石與餐芝瑤姬兩字朱文押

披圖既約鳴秋籟卅年風月真無奈

謂卷中麗某題句

犀梳便

欲奪曲中繭紙從教購海外舊軸摩挲傳是樓那堪風

散與雲流六朝春恨緘啼鳥何必盧家喚莫愁湘江翠

拂水清淺空谷含芳自舒卷

並湘蘭綺語

應待江淹揮彩毫

繞砌紅蘭涼露泣

一作波浪瀉碧晴絲捲

碧浪湖銷夏詩

有序

碧浪湖者馬氏銷夏所鑿也五代距今未及千禩趙宋以降改爲蘭若中更兵燹倏廢倏興崇臺曲沼莫覓頽垣桂檝蘭橈祇餘蔓草雖參天老樹依然虎踞龍蟠繞岸新荷未免珠傾玉碎頃者游仙振袂談佛拈花屋小

郭集四

三

牽舟窗低列岫火雲斂爛清風引涼蟬聒高枝鴨嬉淺渚漁燈三五搖麓寺之鐘雉堞百重覆湘春之堦今來古往樂極哀生演爲長句藉攄短憾云爾

一軍搯斷湘西路春草春花疊無數草色芊眠不解愁花顏嬈娜偏增如澆愁莫過楊柳橋醫妒商量束細腰龍戰豈知金印貴鴟張惟覺玉驄驕鴟張龍戰年復年割據荆南閩越連碧湘宮鎖餘焦土祓禊亭荒賸古甌甌壤土厚人難見國勢如棊肘腋變文采爭攀五鳳樓奢淫巧構九龍殿龍舟綵女望如雲鳳輦猶聞日幾巡煮豆然其終召釁酒囊飯袋竟戕身白馬馱經耽淨業

紅羊歷盡恆沙劫孤城萬仞摧狼煙壯士千營換犀甲
萼萼戰鼓咽江聲隱隱齋魚靜客心萬隴稻花晨雨浥
半湖蓮芡夕陽沈秋風黃葉蟬無語寺僻雲深能卻暑
賞邀鐵券頓覆唐動鐫銅柱仍收楚楚國河山舊迹存
休分蟻潰與蜂屯摩挲殘碣剔苔蘚行人尙說會春園
秋蘭

不與羣芳競鬪妍也畱標格豔陽天郢人白雪聊傳曲
楚客青琴竟換絃葉覆玉池心折佛根蟠綺石夢疑仙
孤高豈必依空谷冷月如鈞不捲簾

秋水漣漪秋草萎移蘭誰復惜芳時豔情不減陶彭澤

郭集四

五

春恨無如杜牧之燕女入宮攀孝竹漢皇出閣產靈芝
青袍老大慚辭賦九畹休憐兩鬢絲

負土最宜秋士折灌園權與善人居三春細雨三峰石
一曲清歌一卷書風繞謝庭人倚玉雪飛梁苑客停車
奇香蘊藉紉爲佩嬾向朱門更曳裾

旁觀猶自羨清標一種幽香秋正驕孝子未須疏碧澗
仙人斗覺隔銀橋寒鐙瑟瑟奇思吐畫幌垂垂俗筆描
休問仁鋤兼智水閒愁消盡沈郎腰

讀翁少畦泗源溝上游榷舍柳記感賦卽以畱別兼柬

曹實甫

柳眼青青破曉烟繞堤春水估帆懸荻花楓葉芟除盡
何事潯陽怨四絃

彭澤曾營五畝宅浯溪更製八愚詩邗溝異日增餘慕
權舍棠陰謹護持

相逢舊雨滌鄉愁相送新潮愜遠游折柳臨歧苦相憶
瓜洲星火竹西謳

題湘潭劉楚金讀書圖

往事總模糊琴枯影更枯幸邀采風使畱作臥游圖纂
訂千秋業浮沈七尺軀才豐遇轉嗇天意自齟齬

舊典哀先鄭奇懷挹小徐揮毫集珠玉齧紙辨蟲魚

郭集四

三

軸古香閉錦囊麗藻攄鴿原傷永逝風雨亦愁余
京江紀事

釵挂臣冠語笑譁廿年破例亦看花敢憑潮信耽瓜步
不爲雲容重若耶薄飲儘傾銀鑿落狂游休傍玉鈎斜
尋常一則閑情賦頓使淵明匿片瑕

歡場覓夢總匆匆一闋歌殘燭影紅縱使魯男慚柳下
非關衛女戀桑中梁栖玳瑁深深見巷隔琵琶曲曲通
畢竟青袍嗟老大姓名何必諱江東

金焦雙影掃煙螺畫出眉痕臉又波安石中年寫絲竹
子山異地助悲歌二分尙賸揚州月

屢約劍語游一葉
維揚不果

難停湘上舸

再至京日本擬句畱一日爲同伴歐老促行

好是椒花纔入頰

春風撲面倍溫和

正月七日

潮去潮來曾幾時相逢便算隔年期

乙未嘉平十四日丙申人日並借劍

請同

香奩擬集冬郎句錦瑟難紉春女思菊部兩番徵

北里梅園千樹破南枝京江此後談風月篋裏應添本

事詩

滬瀆雜感

三年兩度嶺南游去燕來鴻盡縮愁世味備嘗如中酒
客懷難遣況悲秋敝裘什襲恩非薄古劍摩挲願莫酬
舊迹重尋轉惆悵西風含淚過眞州

郭集四

三

作客無如獨客難新霜天氣裕衣單飢驅萬里仍浮海
飽看羣花屢倚欄寂寞揚雲加馬齒孤高閔仲戀豬肝
噴吮病骨渾忘倦伏枕吟成意未安

春風撲面倍溫和
潮去潮來曾幾時相逢便算隔年期
香奩擬集冬郎句錦瑟難紉春女思菊部兩番徵
北里梅園千樹破南枝京江此後談風月篋裏應添本

